

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon

Tuig XXXV No. 7

Abril 7, 2004

[www.philippinerevolution.org](http://www.philippinerevolution.org)

## Editoryal

# Pamatukan ang nagabaskog nga pagpamigos sa pumuluyong Moro

**D**ugang nga ginapabaskog sang rehimeng Arroyo ang pagpamigos sa pumuluyong Moro. Mabaskog nga kahadlok ang nagaputos subong sa pumuluyong Moro bunga sang mga pagpangsona sa ila mga komunidad, pagreyd sa ila mga balay, arbitrario nga pagpang-aresto kag pagpangtor-tyur sa kuno mga terorista sa kubay nila. Ang plano sang Philippine National Police nga ipatuman ang sistema sang "Muslim ID" nagalapak lamang sa ila mga kinamatarung sibil.

Lubos nga ginakundenar sang Partido Komunista sang Pilipinas kag bilog nga rebolusyonaryong hublag ang wala untat nga mga atake sang rehimeng Arroyo batuk sa mga tawhanon nga kinamatarung sang pumuluyong Moro. Ang mga tikang sang reaksyunaryong rehi-men nagapalubha sa pungsodnon nga pagpamigos kag prehudisyal nga pagtrato sa mga Moro kag nagalaragway sa ila bilang mga kriminal, tulisan kag elemento nga anti-sosyal. Dala sang mga tikang sang rehimeng Arroyo, gilayon subong nga ginamarkahan man sila nga mga "terorista." Ginahingalitan



kag labing ginapalain sang rehi-meng Arroyo ang mga nagaluntad nga sala nga anti-Moro nga pamen-saron kag kultura sa tuyo nga ipatu-man ang mga polisiyang anti-Moro.

Ginasakpripisyo sang rehimeng Arroyo ang interes sang pumulu-yong Moro sa ngalan sang anti-te-rorismo. Paliwat-liwat nga ginara-son sang rehimeng Arroyo nga may ara kuno mga "intelligence report" nga plano sang Abu Sayyaf nga

sundan ang terorista nga pagpang-bomba sa Madrid, Spain sadtong Marso 11 sang pareho man nga pagpangbomba sa Kamaynilaan.

Tuso nga katuyuan sang rehi-meng Arroyo nga paluntaron ang kahadlok kag isterya sa pumulu-yong Pilipino, maghatag-rason kag magkuha sang simpatiya sa paga-himuon sini nga mga pasistang tikang batuk sa mga Moro. Paagi sa mga ini, nagalaum ang guban

***Mga tampok  
sa isyu nga ini...***

**Mga tampok nga pag-lapas sa tawhanong kinamatarung**

PAHINA 3

**Ambus  
sa Camarines Sur**

PAHINA 6


**Pagbato sa RSOT  
sa Eastern Visayas**

PAHINA 9

## Mga Moro, naglunsar sang protesta

Mabaskog nga gin-kundenar sang libu-libo nga Moro ang mga iligal nga pang-aresto, pagku-ot kag paghunong sa pare-ho nila nga Moro sining karon lang sa Metro Manila angot sa “kampanya batuk sa terorismo” sang rehimeng Arroyo. Nagmartsa ang mga Moro halin sa nagkalain-lain nga komunidad sang mga Muslim kag naghiwat sang *prayer rally* sa Quezon Memorial Circle banda ala-una sang kaaganhon sining Abril 6. Isa sa mga nagtambong kag nagpamulong-pulong ang Islam *convert* nga aktor nga si Robin Padilla. Sa adlaw man nga ini, ginpamunuan sang Muslim Multi-Sectoral Movement for Peace and Development ang may 7,000 nga nagprotesta sa Plaza Cabili, Bangolo, Marawi City.

Antes ini, ginpakamalaut ni Almirah Ali Lidasan, nominado sang Suara Bangsa Moro ang pagpang-ipit sa kapareho niya nga Moro paagi sa Muslim ID System kag iban pa nga anti-Moro nga polisiya sang gubyerno. Nag-paabot man sang pagkabalaka ang may 250 katapu sang Ulama League of the Philippines, organisasyon sang mga lider-relihiyosong Muslim.



Arroyo nga makakuha sang dugang nga mga boto nga desperado nga kinahanglanon sini sa maabot nga eleksyon.

Labi nga ginapabaskog sang rehimeng Arroyo ang pungsodnon nga pagpamigos sa pumuluyong Moro. Kinahanglan gid nga pamatukan sang pumuluyong Moro ang mga tikang nga ini sang rehimeng Arroyo kag pangapinan ang ila mga demokratiko kag pungsodnon nga kinamatarung kag interes. Kinahanglan ipabatyag sang pumuluyong Moro sa rehimeng Arroyo ang kaakig sang isa ka pumuluyo nga nagabatas sang pungsodnon nga pagpamigos kag ipanindugan ang pagrespeto sa ila kag sa ila mga kinamatarung.

Sa ila pagbato, kinahanglan man sang pumuluyong Moro nga agumon ang suporta sang bilog nga pumuluyong Pilipino. Ang amo nga pagsuporta pagtindog batuk sa pungsodnon nga pagpamigos sa pumuluyong Moro.

Ang pagtuyo sang rehimeng Arroyo nga hugton kag pintasan ang mga Moro pauna nga tikang sang reaksyunaryong estado para ipapanog sa ulihi ang pasista nga pagginahum sa bug-os nga pumuluyong Pilipino.

Kinahanglan bantayan man ang mga maitom nga tuyo sang rehimeng Arroyo nga gamiton ang ginasingil sini nga mga “teroristang pamahug” bilang tapalan sa mga tikang nga mahimo ipatuman sini sa atubang sang posible pagkalutos sini sa maabot nga piniliay ukon, kon “magmilagro” kag magdaug man ini, sa atubang sang ginapanan-aw nga mabaskog nga pagbato sang pumuluyo sa pagahimuon sini nga dalagkuan kag malaparan nga pagdinaya.



Kinahanglan tukuron ang malapad nga paghiliusa sang

pumuluyong Pilipino agud paslawon ang maitom nga mga tikang sang rehimeng Arroyo batuk indi lamang sa pumuluyong Moro kundi sa bug-os nga pumuluyong Pilipino. Madalum ang importansya sang mga kasugot kag pagbuligay sang mga organisasyong Moro kag sang nagkalain-lain nga progresibo kag demokratikong organisasyon sang pumuluyong Pilipino.

Ang Partido Komunista kag rebolusyonaryong kahublagan lubos nga nagasuporta sa pagpanday sang paghiliusa sang pumuluyong Moro kag indi Moro. Bug-os sini nga ginasupotahan ang pagbato sang pumuluyong Moro batuk sa mga atake sang rehimeng Arroyo.



Tuig XXXV No. 7 Abril 7, 2004

Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

[www.philippinerevolution.org](http://www.philippinerevolution.org)

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: [angbayan@yahoo.com](mailto:angbayan@yahoo.com)

### Kaundan

Editorial	1
Mga paglapas sa tawhanong kinamatarung	3
32 bilanggo pulitikal, pagahilwayon	5
Mga atake sa progresibong partido	6
Ambus sa Camarines Sur	6
Madinalag-on nga opensiba sa EV	8
Sibilyan ginapanaming	9
Pagbato sa RSOT sa EV	9
Inaway sa Cagayan Valley	12
BHB sa Mindanao	12
Napaslawan nga pribatisasyon	13
Balita	14

Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas



# Mga tampok nga paglapas sa tawhanon nga kinamatarung sa unang kwarto



**T**alalupangdon nga bahin sang mga paglapas sa tawhanon nga kinamatarung subong nga unang kwarto sang 2004 ang pagkuot, pagpatay kag pagpangharas sa mga kandidato kag myembro sang mga progresibong partido sa tunga sang nagainit nga pagpangampanya para sa eleksyon sa Mayo. Tampok ang brutal nga pagpatay sadtong Pebrero kay Juvy Magsino, vice mayor sang Naujan, Oriental Mindoro kag kandidato sang Bayan Muna sa pagkaalkalde.

Nagdamu man sining Marso ang mga kaso sang pagpamigos batuk sa mga komunidad kag pumuluyong Moro kag lumad, gamit bilang tapalan ang kampanya batuk sa terorismo. Amo man, wala untat gihapon ang mga abuso militar kadungan sang mabaskog nga militarisasyon sa kaumhan.

Masunod ang pila sa nalista nga pinakamaathag nga kaso sang paglapas sa tawhanon nga kinamatarung halin Enero tuhtub Abril 1.

**Abril 1.** Lima ka sibilyang Moro ang ilegal nga inaresto kag inakusahan mga katapu sang Abu Sayyaf. Nagaplano kuno magpalupok sang mga bomba sa Metro Manila ang lima. Ginbakol kag tinortyur si Abduwali Villanueva, isa sa mga inaresto nga Moro, agud akuon nga terorista kag magpirma sa dokumento nga nagaako sa mga bomba nga nakuha sang mga pulis sa mga ginlunsar nga reyd sa Makati kag Quezon City.

**Marso 27.** Ginkuot sang mga indi pa nakilala nga tawo si Bong Manalili, lider sang Mexico Transport Group sa Mexico, Pampanga. Tuhtub subong wala ginpalutaw si Manalili.

**Marso 26.** Wala pili nga ginsalakay sang mga operatiba sang National Capital Region Office kag Central Police Department-Special Weapons Action Team ang Islamic Center sa Ermin Garcia St., Quezon City kag gindakup ang duha ka babayeng Moro nga

ginasuspetsahan nga terorista.

**Marso 1-22.** Napulo ka tawo ang ginkuot sang militar halin sa magkalapit nga munisipalidad sang Tinambac, Goa kag Lagonoy sa Camarines Sur kaangot sang operasyon nga paglagas sa mga gerilya nga Bagong Hukbong Bayan (BHB) nga bumihag sa duha ka suldado sa isa ka taktikal nga opensiba sadtong Marso 1 sa Barangay Bataan, Tinambac.

Unang nga ginkuot sadtong Marso 2 si Jaime Rodriguez, 60 kag Isiderio de los Santos, pareho nga organisador sang Bayan Muna. Ginsundan ini sang pagkuot kanday Emilio de los Santos, Sonny de los Santos, Ariel Candelaria kag Berning Abellana sadtong Marso 5.

Ginkuot man sang mga elemento sang 9th ID si Joel Guilan, 18, sang wala makita ang iya ama nga si Juanito nga ginaakusahan myembro sang BHB. Gintakpan sang panyo ang iya bibig kag ilong tuhtub

madulaan siya sang animo. Sang makabugtaw siya, nakagapos na siya sa isa ka koprahan. Ginkuhaan gapos siya kag ginhigot naman sa isa ka puno sang kahoy.

Sadtong Marso 16, ginkuot sanday Wilfredo Velarde kag Joseph Carlote sa Barangay Salvacion, Tinambac samtang nagatrabaho sila sa bodega sang kopra ni Velarde. Ginbaluskay anay ang kagamitan sa balay ni Velarde agud pangitaon ang ginatago kuno sining mataas nga kalibreng pusil. Sang wala sila makit-an, pinosasan kag gindakup si Velarde. Gindala man si Carlote sang magpangabay ang misis ni Velarde nga updan ni Carlote ang iya bana.

Pinakaulihi nga ginkidnap amo si Domingo Mata sining Marso 22.

**Marso 13.** Gindakup sang 15 armadong tawo si Pedro Bueta, 54, organisador sang Anakpawis, sa Barangay Buo, Magdalena, Laguna. Ginpakita lang siya sadtong Marso 20.

**Marso 10.** Ilegal nga inaresto sang mga elemento sang 46th IB si Joy Batis Paloma, 17, organisador





sang Anakpawis, sa Barangay Hiluctugan, Carigara, Leyte. Duha ka adlaw siya nga gin-imbestigahan kag binuhian lamang sadtong Marso 12 matapos ini ginkampanya sang mga organisasyon nga nagasakdag sa tawhanon nga kinamatarung.

**Marso 5.** Sekswal nga inabuso sang isa ka suldado ang isa ka 16-anyos nga dalaga samtang gina-interogar sang mga sulda-do sang 42nd IB ang iya nobyo nga si Levy Caganda sa ila balay sa Del Carmen, Lagonoy, Camarines Sur.

**Marso 2.** Pwersahan nga ginpaggiya sa operasyon militar sang 19th IB kag PNP Regional Mobile Group sa Barangay Wague, Leyte, Leyte sanday Maximo Pobadora, isa ka barangay tanod kag Iluminado Troyo, konsehal sang barangay. Isa ka simana man nga naggamo ang pangabuhian sang mga taga-barangay Wague, Cabungahan kag Tagabaca sang mapilitan sila mag-ebakwet bangud sa operasyon.

**Pebrero 21.** Wala pa gihapon ginbuhian sanday Jaqueline Paguntalan, 26 kag Rolando Portaliza, 30, pareho nga mga organisador sang Bayan Muna nga ginkuot sa Barangay Kilim, Baybay, Leyte sang apat ka lalaki nga ginapatihan mga elemento sang Internal Security Unit. Pakadto sila sa isa ka miting sang Bayan Muna sang pilit sila isakay sa isa ka itom nga van. Nakapalagyo ang isa nila nga upod, nga amo ang nagbalita sang hitabo. Bag-o ini, isa pa ka organisador sang Bayan Muna ang ginkuot sang mga armadong lalaki sa Can-avid, Eastern Samar sadtong una nga simana sang Pebrero.

**Pebrero 18.** Ginkuot kag ginsalbeyds sang pito nga ginadudahan nga militar si Edrian Aliaga,

*coordinator* sang Anakpawis sa Sta. Cruz, Mindoro. Pwersahan siya nga ginkuha banda 2:30 sang kaagahan sa iya balay sa Barangay Lumang Bayan, Sta. Cruz. Nakit-an masunod nga adlaw ang iya bangkay nga tadtad sang buno kag may isa ka igo sang bala nga nagalutaw sa Amnay River sa kaingod nga banwa sang Sablayan.

**Pebrero 13.** Brutal nga ginpatay si Juvy Magsino, vice mayor sang Naujan, Oriental Mindoro kag tagapamuno sang Provincial Justice and Peace Council. Upod niya nga ginpatay si Leima Fortu, Secretary-General sang Karapatan-Oriental Mindoro. Ginpangluthang sila sa ila salakyan sa Barangay Pina-sabangan-2, Naujan sang mga nakamotorsiklo nga berdugo sang 204th Brigade sang Philippine Army. Si Magsino isa man ka maisog nga abugado nga tagapangapin sa tawhanon nga kinamatarung kag kandidato sa pagka-alkalde sang Naujan sa idalum sang Bayan Muna.

**Pebrero 12.** Iligal nga inaresto, ginpangbakol, ginkulata, ginpakahuy-an kag pilit ginpaako mga gerilya sang BHB ang siyam ka B'laan sang abtan sila nagatulog sang mga elemento sang 66th kag 39th IB sa isa ka payag sa Barangay Lam-alis, Kidapawan, North Cotabato. Si Flory Balilid ginhub-lasan samtang ginakulata kag ginpahug nga pagapatyon.

Sanday Lucio Peles, iya asawa kag anum pa nga B'laan ginkawat sang bugas kag iban pa nga pagkaon kag pilit mga ginpakarga sang mga kagamitan militar bisan nangluya na sila sa balbal. Gin-interoga sila kag ginhilway lamang sang pirmahan nila ang isa ka dokumento nga

nagasaad na sila mga myembro sang BHB kag wala sila gintoryur sang militar.

**Pebrero 8.** Iligal nga gindetiner sang mga elemento sang 71st IB si Teresita Abellera, *coordinator* sang Bayan Muna sang Lupao, Nueva Ecija.


**Pebrero 6.** Iligal nga ginrekisa sang mga elemento sang 31st Recon Company sa pagpamuno ni 1Lt. Raul Vigo ang balay ni Florida Echalar sa Sityo Buyuan, barangay Tigbanaba, Igaras, Iloilo.

Ginkawatan man sang militar ang balay sang tiyo ni Meryl Eleccion, organisador sang Alyansa sang mga Mangunguma sa Igaras. Ginharas man si Eleccion.

**Pebrero 2.** Arbitrario nga inaresto, gin-interogar kag gindetiner sang mga elemento sang 61st IB sanday Isabel Necessario, katapu sang Anakbayan kag mga myembro sang Bayan Muna nga sanday Julia Tabat kag Medardo Sayosa, sa Barangay Molobolo, Cauyan, Negros. Gintamnan sila sang mga bala kag dokumento kag inakusahan mga gerilya sang BHB.

**Pebrero 1.** Hinaras sang mga elemento sang RSOT sang 5th Infantry Division si Maricel Andaya, residente sang Pila East, Sta. Lucia, Ilocos Sur. Pilit siya nga magsugid kon sa diin ang iya nobyo nga ginaakusahan sang militar nga katapu sang BHB.

**Enero 27.** Ginpaandaman kag ginpahug sang 50th IB sang Philippine Army ang mga residente sang Barangay Sapang kag Sugay, bayan sang Sta. Lucia, Ilocos Sur. Pilit sila nga ginpaako nga mga tagasuporta sang BHB. Nagpanaog ang militar sang *curfew*. Naglunsar man sang mga operasyon militar sa mga baryo sang Baracbac kag Abaya, Galimuyod.



# 32 sa masobra 300 bilanggo pulitikal, pagahilwayon

**N**angako ang Gubyerno sang Republika sang Pilipinas (GRP) nga pagahilwayon na halin Abril 5 tuhtub Mayo 4 ang 32 bilanggo pulitikal nga nakahunong sa nagkalain-lain nga bilangguan sa pungsod. Kabahin ini sang mga *confidence-building measure* nga pormal ginpaabot sadtong Abril 2 ni Silvestre Bello III, puno nga negosyador sang GRP, sa *peace panel* sang National Democratic Front of the Philippines (NDFP).

Nagtipon sa Oslo, Norway ang duha ka panel halin Marso 30 tuhtub Abril 3 para sa ikaduha nga pagpulung umpisa nga liwat ginlunsar ang pormal nga sugilanon pangkalinungan sadtong Pebrero.

Kabahin sa mga pagahilwayon ang pito ka babayeng bilanggo (tatlo sa ila, mga iloy nga nagapasuso pa sang lapsag), napulo minor-de-edad, mga tigulang kag mga balatianon. Kalakip diri si Zenaida Llesis, nga nagabusong sang madakup sa Pagantukan, Bukidnon sadtong Agosto 2002. Ginbun-ag ni Llesis ang iya anak nga si Baby Gabriela sa Bukidnon Provincial Jail sadtong 2003. Nabun-ag nga may balatian sa tagipusuon si Baby Gabriela. May balatian man sa tagipusuon si Llesis.

Bag-o ini, mabaskog nga ginkundenar ni Kaupod Luis Jalandoni, puno sang *peace panel* sang NDFP, ang kapaslawan sang GRP nga sundon ang komitment sini pagpahilway halin sadtong 2002. Naglunsar sang *hunger strike* ang mga bilanggo pulitikal agud ipamilit ang gilayon nila nga paghilway kag ipahayag ang ila indignasyon sa pagpatumbaya sang GRP sa ila kahimtangan. Unang nga nagayuno si Zenaida Llesis sadtong Marso 29. Sumunod sining Abril 2 ang siyam pa nga bilanggo pulitikal sa prubinsya sang Quezon. Gilayon nga ginsundan sila sang 300 pa nga bilanggo pulitikal sa naga-

kalain-lain nga bahin sang pungsod sa pag-ayuno tuhtub Abril 5.

Luwas sa ginpromisa nga pagahilwayon nga 32 bilanggo, may 278 iba pa nga bilanggo pulitikal sa nagkalain-lain nga kulungan. Ang nasambit nga mga bilanggo hungod nga ginpasakaan sang mga kasong kriminal pareho sang *murder* kag *illegal possession of firearms* agud indi sila makapyansa kag agud makabig sila nga bilanggo kriminal kag indi bilanggo pulitikal.

Suno sa ulihi nga pag-athagay sa tunga sang NDFP kag GRP base sa doktrina sang Korte Suprema sa kaso pulitikal ni Amado V. Hernandez, nagkumporme ang GRP sa tindog sang NDFP nga indi dapat ikategorya nga bilanggo pulitikal ang nakahunong bangud sa panindugan pulitikal.

Lakip sa mga wala pa ginkumpormihan sang GRP nga hilwayon amo sanday Donato Continente kag Juanito Itaas. Ang duha gindakup kag ginhunong bangud sa pagkaimbolbar kuno nila sa pagpatay sadtong 1989 kay Col. James Rowe, isa ka espesyalista sa “kontra-insurehensya” halin pa sa gera sang US sa Vietnam kag nakadispusisyon sa Joint US Military Advisory Group sa



Zenaida Llesis at Gabriela

Pilipinas. Hugot nga ginabalabagan sang gubyernong US ang pagpahilway sa duha bisan masobra 15 tuig na sila nga nakahunong kag may kinamatarung mga mapanauangan sang *parole*.

Amo man ang ginatawag nga “Mamburao 6”—ang mga mangu nguma nga sanday Manolito Matricio, Eduardo Hermoso, Ruben Balaguer, Mario Tobias, Joshua Ungsod kag Gelito Bautista. Sadtong 1998 pa sila nakahunong sa asukasyon nga pagpatay sa magulutod nga Michael kag Paul Quintos sa Mindoro sadtong 1997, samtang hayagan nga gin-ako sang Bag-ong Hangaway sang Banwa ang pagpanaug sang silut nga kamatayon sa mag-ulutod bangud sa ila dalagku nga kasal-anan sa pumuluyo.

Luwas sa pagpahilway sa 32 detenido, kalakip sa *confidence-building measure* sang rehimeng Arroyo ang komitment sang GRP nga maghimo sang mga pamaagi para siguruhon kag padasigon ang paghatag sa 10,000 biktima sang diktaduryang Marcos sang indemnikasyon halin sa mga nasekwester nga kinawatan nga manggad sang mga Marcos.





## Atake sa mga progresibong partido, nagabaskog

**N**agabaskog ang mga atake sang rehimeng Arroyo kag mga pasista sa mga progresibong kandidato kag partido samtang nagapalapit ang eleksyon.

Sining Abril 2, ginrekomendar ni Norberto Gonzales, bag-o nga National Security Adviser, nga ihulog na bilang mga partido ang Bayan Muna (BM) kag lima pa ka progresibong partido—Anakpawis, Gabriela Women's Party, Anak ng Bayan, Migrante kag Suara Bangsa Moro. Ginaakusahan niya ang BM nga nagahatag sang masobra P500 milyon sa Bag-ong Hangaway sang Banwa. Ginakakulbaan sang mga reaksyunaryo nga mangin signipikanteng bloke ang mga ini sa kongreso kag daku nga sablag sa mga maka-imperyalista kag kontrapumuluyo nga polisiya sang reaksyunaryong papet nga gubyrerno. Ang mga himu-himo nga akusasyon sang Malakanyang kag AFP nagahatag lamang sang senyal sa mga berdugo kag iban pa nga pasista nga magdugang sang mga atake sa mga progresibong kandidato kag partido. Umpisa sang matukod ang BM sadtong 2001, nagabot na sa 70 ang napatay nga mga lider kag myembro sini. Maluwas ini sa mga ginkidnap, ginasaakit kag ginaharas. Mga pwersa militar kag paramilitar ang tagahimo sa mga krimen nga ini.

Mabaskog nga ginakundenar kag ginapanginwala sang mga progresibong kandidato kag partido ang mga akusasyon ni Gonzales. Lain sa reaksyunaryong gubyrerno nga nagapagusa sa pondo sang pumuluyo, siling nila, ang mga ginapondohan ila amo ang pila ka gatos nga *day care center*, eskwelahan, bomba sang tubig kag mga irigasyon, *farm-to-market road*, tulay, klinika kag iban pa nga proyekto nga mapuslanon sa pumuluyo.

## Ambus sa Camarines Sur

*Sadtong Marso 1, gin-ambus sang BHB ang mga tropa sang 42nd IB sa Barangay Bataan, Tinambac, Camarines Sur. Maayo nga nagamit sa nasambit nga taktikal nga opensiba ang nagkalain-lain nga porma sang eksplosibo agud kibuton kag madasig nga lutuson ang kaaway. Masunod ang pagsaysay sang nagkalatabo.*

**M**aga-ala una sang kaaganhon sang magreport sa radyo ang *lookout* nga nakapwesto malapit sa sentro sang baryo. "Diri na," siling niya. "Isa ka trak."

Gilayon nag-alerto ang mga kaupod nga yara sa pusisyon sang ambus. Ginpukaw ang pila nga nakadapilok na sa paghulat. Pangapat nga gab-i na nila sa pusisyon.

Madasig na naghimos sang mga gamit ang mga gerilya kag pumwesto sa ila tagsa ka kober. Bation ang hagong sang nagapalapit nga trak sang militar. Naghanda ang mga kaupod. Alerto nila nga ginahulat ang *blaster*<sup>1</sup> nga siya ang magahatag sang senyas nga lupok. Ang iskward Kaloy kg Baking ang gintalana nga magduot sa karsada kag maglansang sa kaaway.

Pero gulpe nga nagpundo ang hagong sang trak antes pa nga lubos magsulod sa pwesto sang mga kaupod. Naglakat ang mga suldado.

Preparado ang mga Pulang hangaway sa pagliso sang sitwasyon. Ginhulat nila nga mag-abot ang kaaway sa pwesto sang Kaloy nga amo ang una nga magapalupok.

Pila ka gutlo pa yara sa na siod ang kaaway. Magahod pa nga nagsugilanon samtang nagalakat. Ginpalupok sang Kaloy ang pila ka bomba nga *anti-personnel* bilang *signal fire*.

Madasig nga nakaduot ang Baking sa karsada. Ang Kaloy naatrasar sang pila ka nagabato nga suldado nga bunga sang dulom indi mapat-ud ang ginahamtangan.

"Asolt na, Baking kag Kaloy!" siling sang kumand. Dahan-dahan nga umabante ang mga hangaway

samtang nagapalupok. Sulunod man ang paghaboy nila sang mga improbisado nga granada agud gilayon magguba ang panimuot sang kaaway nga magbato. Nagpal-tos man ang pila nga ginhaboy nga pangsuga. Sa tunga sang dulom, mabatian ang pagdalagan sang mga suldado palayo sa lugar.


Makaligad ang pila ka tion nakadukot gid man ang Kaloy sa kilid sang karsada. Liwat nga nakapangibabaw ang kalinong nga konkis-a ginabuka sang pagbuyayaw kag pagpalupok sang isahanon nga suldado nga nagabato.

Bandang alas-2:15 sang makaasolt ang mga kaupod. Isa ka M203 ang una nila nga nakuha.

Nag-untat ang mga lupok banda alas-2:30 sang kaaganhon. Bag-o mag-alas 3:00, pito halin sa kada iskward ang ginmobilisa para usisaon ang palibot sang ginawayan, lagson ang nabilin pa nga kaaway kag magpangita sang dugang pa nga pusil nga maklining. Pero daku gid nga sablag ang dulom. Nagdesisyon ang kumand nga pagpahuwayon anay ang mga kaupod kag maghulat sang hayag bag-o padayunon ang pagsuyod para sa *clearing*.


Magaalas 6:00 sang aga sang liwat umabante ang mga nakatalana para sa *clearing*. Makalipas ang halos isa ka oras, nadakup nila sa indi gid malayo halin sa ginawayan ang duha ka suldado. Nakakober ang mga ini sa isa gid lang nga puno sang niyog. Nagpaligad sila sang dulom sa paglaum

<sup>1</sup> Tagapalupok sang mga bomba



nga magaatras na ang BHB kag samtang nagahulat sang tabang.

Ginpahamtang sila sang BHB nga magsurender na lang, magpati nga tratuhan sila sang maayo, paga-respetuhon ang ila mga tawhanon nga kinamatarung kag bulgon sila kon may pilas. Wala magdugay nagguwa sanday Lt. Ronaldo Fedelino, kumander sang "C" Company sang 42nd IB, kag Pfc Ronel Lemeno. Ginsurender nila ang isa ka M203, isa ka M14 kag mga bala. Sa pagtatap sila subong sang BHB bilang mga bihag sang gera. Tatlo ka tropa sang kaaway ang kumpirmado nga napatay sa ambus.



### Sumibad sa paon.

Bag-o ang madinalag-on nga opensiba, naglatag anay sang paon ang BHB. Sadtong petsa 27, pila ka kaupod ang hungod naghayag sa sentro sang Tamban, isa ka daku nga baryo sa Tinambac nga may mayor nga pantalan nga nagaserbi nga alagyan sang madamu nga tawo halin sa apat ka banwa sang Camarines Sur. Nakaalis pa lang

sang isa ka detatsment sang 42nd IB sa nasambit na baryo sadtong Disyembre 2003 kag maikit pa ang presensya didto sang mga ahente sang paniktik sang kaaway. Ginsugilanon sang mga kaupod ang pila ka alyado sa baryo kag ginsita kag ginapaandam ang pila ka residente nga nakooperar sa kaaway.

Duha ka adlaw man nga nag-tsekpoynt ang mga kaupod mas o menos limang kilometro halin sa *ambush site* kag pila ka gatos metros lang halin sa Tamban.

Ginapundo sang mga kaupod sa tsekpoynt ang tanan nga salakyan nga nagahalin sa Tamban padulong sa syudad sang Naga. Kada mag-agi sa tsekpoynt ginapaathag sang mga kaupod bahin sa panan-awan sang rebolusyonaryong kahublagan angot sa palaabuton nga eleksyon. Katuyuan man sa pagtsekpoynt nga kumpiskahan sang pusil ang sinuman matyempuhan nga armadong tinawo sang kaaway.

Duha ka tinawo sang CAFGU ang nasita sang mga kaupod sa tsekpoynt kag gilayon nga nagre-port sa kampo sa Mananao. Tinambac. Rumespunde ang militar sadtong Pebrero 29 sang tungang gab-i, kag nahulog sa siod ang 14 sul-

dado nga nag-upod sa *strike operation*.

**Daw pista.** Malipayon nga ginsumalang sang masa sa mga ginagyan nga baryo ang mga hangaway sang mag-atras sila matapos ang madinalag-on nga opensiba sadtong kaagahon sang Marso 1. Sa isa ka temporaryo nga ginpundohan sang mga kaupod, bilog nga adlaw nga wala utod ang pag-abot sang masa nagpabutyag sang ila bukas nga pag-abi-abi. Masako man ang masang taga-tig-ang para sa daku nga tropa nga naglunsar sang taktikal nga opensiba.

Nagadayaw ang bihag nga si Pfc. Lemeno sa nasaksihan niya nga pag-updanay kag paghiliusa sang masa kag Hangaway. "Amo gali kamo kon magtilipun-tipon," siling niya, "daw pista."

Samtang nagaatras, ginsiguro sang mga kaupod ang pagsugilanon kag pagpakigsugilanon sa mga bihag. Ginpaathag sa ila ang mga polisiya sang rebolusyonaryong kahublagan nahanungod sa pagtatap sa mga bihag kag ang proseso sang pagpahilway sa ila. Nakipagtalakayan man sila kaangot sa pila ka halambalanon pangpulitika kag nakisugilanon bahin sa ila mga pamilya kag pagpangabuhi.

AB



# Madinalag-on nga opensiba ginlunsar sa Eastern Visayas


**G**inreyd kag ginguba sang mga gerilya sang Mt. Amandewin Command sang Bag-ong Hangaway sang Banwa (BHB) sa Leyte ang *drilling facilities* (kagamitan sa madaluman nga pagkutkut) sang Philippine National Oil Co. (PNOC) sa Ormoc City sining Marso 26. Madinalag-on nga nailunsar ang operasyon militar nga wala sang lupok. Ginsiguro sang mga Pulang hangaway ang kaluwasan sang tanan sang mga sibilyan nga empleyado sang PNOC, pati sang mga *security guard*.

Ginsilutan ang PNOC bangud sa indi sini pagkilala sa awtoridad sang rebolusyonaryong gubyrno sang pumuluyo, indi pagsunod sa mga polisiya sini sa pagbuhis kag bangud sa pag-agaw sini sang duta sang pumuluyo nga wala sang anuman nga programa nga nagasinguro indi mahalitan sang ila *drilling project* ang pumuluyo.

Nakaagaw ang BHB sang isa ka M16, duha ka *shotgun* kag 17 granadang M203, maluwas pa sa mga bala sang M16. Walo ka tropa sang PNP-Regional Mobile Group nga kalakip sa naglagas sa BHB ang napatay sang lambatan sila sang mga Pulang hangaway. Samtang, suno sa pinakaulihi nga report halin sa Efren Martires Command sang BHB sa Eastern Visayas, 13 suldado sang 34th IB kag isa ka pulis ang napatay sa dungan nga reyde sa detachment sang PNP kag ambus sa mga tropa sang Philippine Army sadtong Marso 17 sa San Jose de Buan, Samar. Una nga ginreport sa AB nga tatlo ka elemento sang PNP ang napilasan sa taktikal nga opensiba nga ini.

Gin-athag sang Efren Martires Command nga ang Alpha Company sang 34th IB ang pangunahon nga target sang opensiba bangud sa brutal sini nga rekord sa paglapas sa mga tawhanon nga kinamatarung sang pumuluyo sa Samar. Kalakip ang masunod sa mga gintumod nga kasal-anan sang kaaway nga yunit:

- Pagpatay kanday Fulgencio Gabin, 60, sa Barangay Gusa, San Jose de Buan sadtong Hunyo 6, 2003 kag kay Jessie Cabarles sa Barangay Toringon, Catbalogan sadtong Nobyembre 23, 2003 bangud sa suspetsa nga tagasuporta sila sang BHB.
- Pagtampalas sa bangkay ni Carlito "Ka Terado" Salingsing, nga gin-utdan sang ulo matapos siya mapatay sa engkwentro sadtong Hulyo 23, 2003 sa Barangay Naguma, Calbayog City, Samar.
- Pagkuot kag pagtortur sa mga ginadudahan tagasuporta sang BHB kag pagbalbal sa mga sibilyan kada may operasyon militar.
- Pwersahan nga paggamit sa mga mangunguma bilang trabahador sa mga kampo militar.
- Walang untat nga pagpanamad sa mga pananum kag pagpatay sa mga ginatatap nga hayup sang masa sa mga operasyon militar.
- Pagpamuno sa mga ilegal nga *logging* kag pagkunsabo sa mga ilegal nga pagtablon sa Barangay Buray, Paranas kag Catbalogan.



- Pagpanguna sa mga garuk kag anti-sosyal nga aktibidades pareho sang pasugal, pagpahubog kag iban pa nga krimen sa mga baryo nga malapit sa kampo.

Ginreport man sang Efren Martires Command ang pagpangibabaw sang mga Pulang hangaway sa duha ka dependsiba nga aksyon sa Leyte kag Eastern Samar.

Sa isla sang Leyte, siyam ka elemento sang 19th IB ang napatay sang maagaw sang BHB ang inisyatiba halin sa mga nagsalakay nga suldado sa isa ka kampo sang BHB sa Barangay Wague, banwa sang Leyte sadtong Marso 2. Isa ka pPulang hangaway ang namatay sa inaway. Hilway nga nakaatras ang iban pa nga gerilyang BHB. Sa Dolores, Eastern Samar, napangibabawan man sang 15 Pulang hangaway sang Lupito Mingote Command ang mga nagaatake nga tropa sang Bravo Company sang 14th IB sadtong Pebrero 18. Lima ka suldado ang napatay—duha sa pagpakigbato sa BHB kag tatlo sang mag-engkwentro mismo ang mga nagamu nga tropa.

AB





## Paggamit sang mga sibilyan nga panaming, ginkundenar

**M**abaskog nga ginpakamalaut sang Efren Martires Command sang Bag-ong Hangaway sang Banwa sa Eastern Visayas ang paggamit sang Philippine National Police (PNP) sa mga sibilyan bilang panaming sa isa ka inaway nga natabo sadtong Marso 26 sa Barangay Lake Danao, Ormoc City, Leyte.

Sa isa ka pahayag sining Abril 1, ginkundenar ni Jose Sumoroy, tagapamaba sang kumand, ang hungod nga pag-upod sang PNP sa tatlo ka empleyado sang Philippine National Oil Corp. (PNOC) bisan nahibal-an nila nga ila makaengkwentro ang BHB. Nahibal-an sang PNP kag sang reaksyunaryong militar nga wala ginadalagang sang BHB ang sibilyan sa paglunsar sini sang armadong paghimakas. Hugot nga nagasunod ang BHB sa internasyunal nga tawhanong layi kag mga pangkalibutanon nga reglamento sang gera luwas pa sa mga pagsulundan sini, sang Partido kag sang National Democratic Front of the Philippines batuk sa pagpanghalit sa mga sibilyan. Ginasaligan sang pulis nga kon makit-an sang BHB nga may upod sila nga tatlong sibilyan, magduduso ini nga ambuson ang ila mga tropa.

Wala ihibalo ang mga Pulang hangaway sang Mount Amandewin Command nga ang mga sibilyan yara sa komboy sang mga tropa nga ginpadala sang PNP sa PNOC. Bangud diri, nadalahig kag napatay sanday Aldrine Alcober, Jerry Flores kag Jaime Celeste, lunsay mga empleyado sang PNOC. Ginpahayag sang Efren Martires Command ang ila pagkasubo sa wala pili nga pagbutang sa peligro sang PNP sa nasambit nga mga sibilyan. Ginapaabot man sini ang sinsero nga pagpakig-unong kag kahandaan nga magbulig sa nailo nga mga pamilya.

Nagapanawagan man ang kumand sa AFP kag PNP nga tahuron ang kinamatarung sang mga inosente nga sibilyan kag magsunod sa Comprehensive Agreement on Respect for Human Rights and International Humanitarian Law. Ginpakamalaut sini ang pwersahan nga paggamit sang militar kag pulisya sa mga sibilyan bilang mga giya sa operasyon ukon pagsugo sa ila magpwesto sa unahan sang ila mga tropa. Luwas pa ini sa pagpangbomba sa mga komunidad, pagpanalbeyds, pagkuot, pagtortur kag iban pa nga mga paglapas sa tawhanong kinamatarung kag internasyunal nga tawhanong layi. **AB**

## Pagbato sa RSOT sa Eastern Visyas



**I**sa sa mga pangunahon nga pamaagi sang kaaway subong sa pagtinguha sini nga dunuton ang Bag-ong Hangaway sang Banwa (BHB) kag mawasak ang rebolusyonaryong baseng masa amo ang paglunsar sang mga operasyon sang Reengineered Special Operations Teams (RSOT). Ang RSOT amo ang ikatlo nga bersyon na sang Special Operations Teams (SOT) nga ginbuhian sang reaksyunaryong estado sadtong dekada 1990. Sang mapaslwan ang una nga bersyon sang SOT nga waskon ang rebolusyonaryong hublag, liwat ini ginlunsar kag ginpangalanan nga Modified Special Operations Teams (MSOT ukon "inamyendahan" nga SOT). Kag sang mapaslawan pa liwat sining ulihi nga kwarto sang 2001, liwat naman ini ginlunsar kag pinangalanan sang "reengineered" ukon "gintukod liwat" nga mga SOT.

Tampok sa RSOT ang pagtambak sang daku nga numero sang militar sa mga baryo nga ginadudahan balwarte sang rebolusyonaryong hublag. Pagasentruhan sang mga ini ang ginasigahum nga mga yabing baryo kag mga kaiping sini. Kinaandan nagagamit ang kaaway sang pinadaku nga platun ukon kusog-kumpanya nga pwersa nga nagarelyebo para mapadayon nila ang operasyon sa sulod sang malawig nga panahon. Masami halin anum ka bulan tubtub isa ka tuig nagalawig ang RSOT sa kada ginasentruhan nga bahin sang mga baryo.

Samtang yara sila sa nasambit nga mga baryo, ginapabaskog nila ang mga operasyon paniktik agud matumod ang mga aktibong gerilya sang BHB, mga ginaangutan kag napahulag kag mga talaguan sang armas sang mga ini. Nagalunsar man sila sang *civil-military opera-*



tions sa katuyuan nga matiulang kag mawasak ang mga organisasyong masa kag makumbinse ang mga myembro sini nga talikdan na ang rebolusyon.

Samtang nagalunsar sang operasyon paniktik kag CMO ang mga pwersa sang RSOT nga nakahayag sa mga baryo, may ara man sila mga pwersang mahulag nga nagalighot sa mga palibot kag nagalunsar sang operasyon kombat batuk sa BHB. Mas daku ang mga pwersa nga nakatalana para sa mga operasyong kombat.

**Pag-atubang sang RSOT sa Eastern Visayas.** Sadtong ulihing tunga sang 2003, ginsuma sang organisasyon sang Partido sa Eastern Visayas (EV) ang manggaranon nga eksperensya sini sa pag-atubang kag pagpaslaw sa mga RSOT.

Natasa nga madinalag-on nga ginbatuan ang RSOT sa EV sa pangkabilugan. Partikular sa prubinsya sang Northern Samar, nagapabilin nga bilog kag mabakod ang rebolusyonaryong baseng masa sa pihak sang mabasog nga pagpaniplang kag kapintas nga ginsabwag sang kaaway para waskon ang mga ini. Sa pihak nga makapahamot kag mapalapit sa pumulyo, dugang nga nabuyag ang pasista nga kinaiya sang kaaway kag labi ini nga nahamulag. Wala man sang nalunsar nga madinalag-on nga atake ang kaaway batuk sa BHB kadungan sang mga RSOT sini. Sa baylo, ang kaaway pa ang nasamaran tuga sang mga taktikal nga opensiba sang mga Pulang hangaway.

**Mabaskog nga taktikal nga pagpamuno sang Partido.** Yabi nga sangkap sa pagpaslaw sang mga RSOT sa EV ang pagpabilin nga aktibong taktikal nga pagpamuno sang mga teritoryal nga komite sang Partido sa mga lugar nga apektado sang RSOT. Nagabuligay

ang mga nagapamuno nga organo sang Partido sa lebel prubinsya, prente kag seksyon para idiriher, isentralisa kag ikoordinar ang nagakalain-lain nga plano kag paghulag batuk sa RSOT.

Sa balayon sang programa sa pag-atubang sa RSOT, nagahimo anay ang Partido sang maathag nga pag-analisa sa nangin dalagan sini. Sa kahimtangan nga ginapatuman kag ginapalapad sa nagkalain-lain nga prenteng gerilya ang RSOT, sa lebel prubinsya ginahimo ang plano sa kampanya sang pagbato diri. Kumprehensibo ang plano, lakip ang pagkumbinar sang pamaagi nga pangpulitika kag militar, armado kag di armado, tago kag hayag kag may koordinasyon sang mga paghulag sa mga prenteng gerilya kag puti nga erya. Base sa ginbalay nga plano sang prubinsya, nagahimo sang partikular nga plano sa lebel prente kag seksyon.

Pinakadirekta nga apektado



ang mga komiteng seksyon, gani pinakamabug-at ang responsibilidad sang mga ini sa pagpaslaw sang RSOT sa tagsa nila nga sakup. Kinahanglan mangin matalom sila sa pagtalana sang mga husto nga hilikuton kag deployment sang mga yunit gerilya.

Sa mga sitwasyon nga mahimo gihapon maghulag ang BHB sa mga militarisadong lugar, ginamaksimisa sang mga yunit gerilya ang inisyatiba kag pleksibilidad, nagapabilin sa erya kag nagapursiger sa mga hilikuton sa bulig sang masa.

Sa sini, ginapanday kag nahanas ang mga yunit gerilya nga magpatuman sang hilikuton sa atubang sang mga peligro.

Labi nga nangin malahalon ang pag-asikaso sa seguridad sang mga yunit gerilya sa mga panahon sang operasyon sang kaaway. Gani dugang nga ginakaptan nila ang tago nga paghulag, mahalang nga pagbabase kag iban pa nga polisy sa seguridad.

**Papel sang sanga sa lokalidad kag mga organisasyong masa.** Bangud ginapatuman ini sa lebel baryo, kritikal nga bahin sa pagbato sa RSOT ang pagpabaskog sang mga sanga sang Partido sa lokalidad kag sang mga organisasyong masa. Pinakadaku nga naagum nga kadalag-an batuk sa RSOT kag pinakamagamay ang nangin kahalitan sa mga lugar kon sa diin aktibo nga nagaandar ang mga sanga sang Partido kag organisasyong masa.

Sa mga kahimtangan nga kinahanglan isaylo ang konsentrasyon sang paghulag sang BHB sa guwa sang ginaoperasyon sang RSOT, kinahanglan likawan ang sobra nga pagtanya sa katalagman kag masyado nga pagpalayo sang yunit sa lugar sang operasyon kag sa angot sa masa. Siguruhon nagapabilin ang maayo nga angot kag padayon nga pag-ubay sa mga sangay sang Partido sa lokalidad kag sa mga organisasyong masa. Sa sini, nabuligan gihapon sang komiteng seksyon ang sanga kag mga organisasyong masa, kag nakakuha gihapon sang impormasyon nahanungod sa dalagan sang RSOT sa lugar.

**Kaugalingon nga pagdepensa sang baryo.** Pila sa mga kongkreto nga tikang nga ginahimo sa lebel baryo pagkatapos maangkon ang paghiliusa sang sanga kag mga organisasyong masa nahanungod sa paglantaw kag pagsabat sa RSOT



ang pagtukod sang kaugalingon nga pagdependa sang baryo. Ang mga pamilya sang mga kaupod nga nagahulag sang pultaym ang pangunahon nagakapeligro nga dukdukan kag iharas sang kaaway, gani ginabuligan sila maghanda sa posible nga pag-imbetigar kag pagpang-ipit sang kaaway. Kabahin man sa mga ginahatagan sang oryentasyon ang mga bata bangud sila ang kinaandan ginalapitan sang kaaway agud lansihon kag kuhaan sang impormasyon. Gina-kuha man sang sanga sang Partido kag mga organisasyong masa ang kooperasyon sang mga punong barangay kag sangguniang barangay para maghulag sa pagdependa sa mga tagabaryo nga ginabiktima sang mga abuso militar.

Direkta nga ginapahulag man sang sanga sang Partido ang milisya sang pumuluyo agud siguruhon ang kaluwasan sang mainit nga kaupod kag aktibista sa baryo, bantayan ang hulag sang kaaway kag regular nga magpaabot sang mga bag-o nga report kag mga impormasyon sa yunit gerilya nga nagahulag sa lugar. Ang mga tumod ukon ginadudahan nga impormer ginadikitan, ginasugilanon, kag ginatinguhaan nila nga nyutralisasyon para indi magamit sang kaaway. Ang iban ginakumbinse nga magsaylo anay sa iban nga lugar.

Bunga sangmga ini, napaslawan ang kaaway nga tumuron kag waskon ang mga sanga sang Partido kag mga organisasyong masa sa baryo. Naamligan ang mga kaupod kag aktibista nga gina-initan sang kaaway. Kag indi makarekrut ang kaaway sang mga bag-ong impormer kag mga pwersa para sa CAGU.

**Malaparan kag mabaskog nga kahublagang masa.** Epektibo nga armas batuk sa RSOT ang isa ka malapad kag mapagros nga kahublagang masa nga nagagamit sang ligal kag indi ligal, hayag kag tago

nga mga porma sang paghulag kag paghimakas para paslawon ang RSOT. Malahaloon nga sangkap ini sa pagpanday sang mapang-away nga ispiritu sang masa para pangapinan ang ila nga kinamatarung kag interes kag isulong ang rebolusyon.

Sa eksperensya sang EV, madinalag-on nga nailunsar sa hayag ang pagpapirma sang libu-libo nga pumuluyo halin sa 112 baryo kag 14 nga munisipalidad sa petisyon para pahalinin ang RSOT. Nakalunsar man sang delegasyon kag dayalogo nga ginapasakupan sang 100 tiglawas sang pumuluyo sa 75 baryo kag 14 munisipalidad. Gintalakay, ginbuyagyag kag ginpamatuksan ang RSOT sa mga porum nga ginlunsar sa 13 munisipalidad. Nagpagguwa sang mga pahayag sa masmidya, nagtawag sang mga pulong masa, nagpasaka sang mga reklamo kag kaso sa korte kag naglunsar sang kampanya kag paghulag para mapahilway ang mga gindakup.

Paagi sa mga hayag kag ligal nga paghulag, dugang nga naglapad ang hilikuton alyansa. Napahulag ang daku nga numero sang pumuluyo indi lamang halin sa basehang masa kundi pati nahanungang pwersa, mga upisyal sang lokal nga gubyrno kag iban pa nga sektor. Naagum ang malapad nga paghiliusa batuk sa mabaskog nga mga abuso militar, dislokasyon sang pangabuhian kag pagpanamad sa propyedad nga gintuga sang RSOT.

**Mga taktikal nga opensiba kag iban pa nga aksyong militar.** Kon usisaon, ang mga panahon nga nagahimo ang kaaway sang RSOT paborable sa paglunsar sang mga

aksyong militar sang BHB. Mabaskog ang demanda sang masa nga bunalan ang mga yunit sang kaaway nga yara sa sulod mismo sang mga rebolusyonaryong teritoryo. Indi na kinahanglan pa nga kadtuan ang kaaway sa malayo nga lugar. Luwas nga nakuhaan naton sila sang armas, mabaskog nga sampal ang mga opensiba nga ini sa kaaway nga nagapabugal sa masa nga naubos na nila ang BHB. Ang mga atake naton sa mga RSOT ang nakabulig sang daku para sablagan ang mobilidad sang kaaway kag mangin dalan sa temprano nga pagtapos sang RSOT.

Sa EV, epektibo nga nadunganan man sang mga espesyal nga operasyon partisano ang mga taktikal nga opensiba sa mga

regular nga yunit sang kaaway nga nagadungan sa RSOT. Importante nga tikang militar ang pagsilut sadtong Enero 2003 kay Maj. Danilo Bilion, ang *operations chief* sang 803rd Brigade nga nakabase sa Northern Samar kag pinakamasupog nga tagalapas sang tawhanon nga kinamatarung sa prubinsya. Direkta nga responsible si Bilion sa madamu nga kaso sang pagtortur kag pagpatay halin pa sang pa-



munuan niya ang mga SOT bilang upisyal sang 19th IB sadtong una nga bahin sang dekada 1990. Matingkad man niya nga kaso ang pagpaantos kag pagpanglugos sa kababaihan kon nagalunsar sila sang mga operasyon militar. Labi nga nakapapagsik sa masa sa bilog nga prubinsya ang pagsilut kay Bilion. Bunga man sini, nanyutralisa kag nahabig ang pila ka pwersa sang kaaway.

AB



## Inaway sa Cagayan Valley

Siyam ka suldao sang 45th Infantry Battalion kag 53rd Reconnaissance Company ang namatay sa natabo nga inaway sa tunga sang mga gerilyang BHB kag militar sa Barangay Dicamay Uno, Jones, Isabela sadtong Marso 19. Nagapatrulya sadto ang 15-katawong tropa sang AFP banda alas-6 sang agahon sang namataan sila sang isa nga nakapundo nga platon sang BHB sa idalum sang Benito Tesorio Command. Gilayon nga nagplano sang paglambat ang mga Pulang hangaway.

Nagsugod ang inaway banda 6:30 sang aga kag naglawig sang duha ka oras. Ang nga nabilin nga tropa sang kaaway nagsutsot sa masiok nga kakahuyan gani wala sila lubos nga mapapas.

Madugay na nga nakahalin ang mga gerilya sa lugar pero bangud sa mabaskog nga kulba wala mabuligan sang husto sang mas daku nga tropa sang AFP nga yara sa malapit lamang nga lugar ang napaaway nila nga mga kaupdan.

Nabulig lamang ang AFP ang ila napaaway nga mga kaupdan banda alas-5 sang hapon, matapos bombahon sang duha ka Tora-Tora kag masingganon sang isa ka Huey helikopter ang lugar nga ginawayan. Dali-dali nila ginsakay sa helikopter ang ila mga patay kag pilason agud indi makita sang masa.

Ang mga napaaway nga suldao kabahin sang anum ka platon nga tropa nga naga-operasyon sa mga munisipalidad sang Jones kag Echague may isa ka simana na bag-o ang inaway. Reaksyon ini sang 5th Infantry Division sa ginhimo nga pagdisarma sang BHB kay Congressman Giorgidi Aggabao sang Isabela, himata ni Danding Cojuangco kag malapit nga alyado ni Gov. Faustino "Junior" Dy. Upod man ni Aggabao nga gindisarmahan ang duha ka meyor, isa ka bokal kag mga badigard nila. Tuyo man sang operasyon militar nga pungan ang pagdagsa sang mga kandidato sa piniliay nga magkuha sang Permit-To-Campaign sa rebolusyonaryong guberno sang pumuluyo.

Ginharas man sang mga naga-operasyon nga militar ang mga myembro sang ligal nga progresibong partido kag iban pa nga organisasyon kag indibidwal nga nagabato sa dinastiyang Dy sang Isabela. Hayagan nila ginakampanya si Governor Dy kag mga gamay sini.

Madugay na nga kapot sang pamilya Dy ang reaksyunaryong pulitika sa Isabela. Luwas kay Gov. "Junior" Dy, kabahin sa mga Dy nga nagakapot sang gahum sa prubinsya amo si Mayor Caesar Dy sang Cauayan kag Congressman Fautino Dy III sang ika-3 distrito sang Isabela. AB

## BHB sa Mindanao: Nagadaku, nagabaskog

Padayon nga nagabaskog ang pwera sang Bag-ong Hangaway sang Banwa (BHB) sa Mindanao kag ginalauman nga lampasan pa sini ang mga naangkong nga kadalag-an sadtong 2003.


Suno sa pahayag sang Komisyon sa Mindanao sang Partido Komunista sang Pilipinas sining Marso 29, nakapalapad na ang BHB sa 2,000 baryo ukon sa 20% sang kabilugang 10,021 baryo sang Mindanao. Nakadeploy na ang mga yunit gerilya sang BHB kag mga organo sang gahum pangpulitika sa masobra 200 syudad kag munisipalidad sa 19 prubinsya sang ikaduha nga pinakadaku nga pulo sa pungsod. Sa 128 prenteng gerilya sa bug-os nga pungsod, 39 sini ara sa Mindanao.

Nakalunsar sang masobra 100 taktikal nga opensiba ang BHB sa Mindanao sadtong 2003. Tanan ini madinalag-on. Pila sa talalupangdon nga taktikal nga opensiba ang pagsalakay sa detatsment sang Paper Industries Corporation of the Philippines (PICOP) sa Bislig, Surigao del Sur; sa Carmen, Agusan del Norte; sa San Luis, Agusan del Sur; sa San Fernando, Bukidnon; kag sa San Miguel, Zamboanga del Sur.

Nakuha halin sa mga ginlunsar nga ambus kag reyd ang mas o menos 200 mataas nga kalibreng riple, luwas pa sa mga bala kag kagamitan militar. Pinakadaku nga numero ang 92 riple nga nakumpiska sa armori sang PICOP sadtong Marso 2003. Ang mga suldao nga nagasimpatiya sa rebolusyonaryong hublag nakaamot man sang mga armas kag bala, pareho sang mga inentregar sang duha ka suldao sang 29th Infantry Battalion sang Philippine Army sa Agusan del Sur.

Nakuha halin sa mga ginlunsar nga ambus kag reyd ang mas o menos 200 mataas nga kalibreng riple, luwas pa sa mga bala kag kagamitan militar. Pinakadaku nga numero ang 92 riple nga nakumpiska sa armori sang PICOP sadtong Marso 2003. Ang mga suldao nga nagasimpatiya sa rebolusyonaryong hublag nakaamot man sang mga armas kag bala, pareho sang mga inentregar sang duha ka suldao sang 29th Infantry Battalion sang Philippine Army sa Agusan del Sur.

Bangud sa pagdamu sang mga organisadong komunidad, naggamay ang numero sang mga depensibong aksyon sang mga yunit sang BHB. Sa mga kahimtangan nga napadepensiba ang mga Pulang hangaway, halog sila nga nakamaniobra para lutuson ang mas daku nga pormasyon sang kaaway kag nakapangibabaw bisan sa mahaba nga inaway pareho sang natabo sa New Bataan, Compostela Valley sadtong Hunyo 30. Dose ka mataas nga kalibreng armas ang nakumpiska kag 10 suldao ang napatay sang maagaw sang BHB ang inisyatiba sa isa ka nagaatake nga platon sang 60th IB. AB



**George "Ka Oris" Madlos,**  
**Tagapamaba NDFP-Mindanao**

# Napaslawan nga pribatisasyon

Sining Marso, hayagan kag lubos nga nabuyagyag ang puno kag punta sang pagpakig-areglo sang rehimeng Arroyo sa pamilya Lopez agud isalbar sang mga kumpanya nila halin sa nagapadayon nga pagkaputo kag labing padakuon pa ang mga kita sang mga ini. Umpisa pa sadtong nagligad nga tuig, makapila ka beses na nga "gintabangan" sang rehimen ang nagkalain-lain nga kumpanya sang mga Lopez nga nakapaidalum sa mga puno nga kumpanya nila nga First Philippine Holdings Corporation kag Benpres Holdings. Kalakip sa mga ini ang Bayantel, Meralco, First Philippine Infrastructure Development Corporation (FPIDC) kag Maynilad Water Services, Inc.

Gilayon nga yara sa likod sang "pagtabang" sang gubyerno sa nagakaputo nga Maynilad wala huya nga pag-areglunanay sang rehimen sa pamilya Lopez kabaylo sang suporta kag pondo para sa kandidatura kag ginalauman nga padayon nga pagginahum ni Arroyo. Matingkad sining ginalaragway ang kun-sabuhan sang mga imperyalista, daku nga burgesya kumprador kag daku nga burukrata kapitalista agud protektahan ang kada kaugalingon nilang nga interes kag dugang pa nga pugaon ang pumuluho. Ang pagsalbar sang gubyerno paagi sa pagsulod sang mga Lopez kag sang gubyerno sa kasugtanan nga "debt-to-equity swap" ukon pagtransporma sang utang pakadto sa puhunan. Ang Maynilad ang kumpanya nga ginapanag-iyahan sang mga Lopez kag imperyalistang grupo nga Suez-Ondeo sang France nga nakakuha sang konsesyon sa serbisyo sa tubig para sa nakatundan nga bahin sang Kamaynilaan.

Sa idalum sang kasugtanan nga ini, indi na pagbayaran sang Benpres ang P8 bilyon nga utang sini

nga mga *concessions fee*. Sa baylo, ang utang nga ini dulaon, kag bilang kabaylo isaylo sa Manila Waterworks and Sewerage Systems (MWSS), ahensya sang gubyerno nga nagadumala sa serbisyo sa tubig, ang 61% sang mga sapi sa Maynilad nga kapot sang Benpres.

Sa sini, makalibre ang Benpres sang P3.4 bilyon bangud P4.6 bilyon lamang ang balor sang ginbutang sini nga kapital sa Maynilad.


Luwas sini, indi nga ibalik sa mga konsyumer ang P6.4 bilyon nga iligal nga ginsukot sang Maynila kag ginulsa na sang mga Lopez kag Suez-Ondeo sadtong nagligad nga tatlo ka tuig. Malibre man sila sa pagbayad sang P11 bilyon nga utang sang Maynilad umpisa pa sadtong 1999.

Ang tanan nga ini saluon na sang gubyerno. Ginabalibaran sang Benpres kag Suez-Ondeo nga ginahimo nila nga bulugasan ang Maynilad samtang ginadumalahan nila ini kag bangud diri lunod na gid sa pagkautang ang kumpanya. Pero suno man sa rekord sang kumpanya, nag-abot sa P19.1 bilyon ang kabilugan nga utang sang Maynilad samtang sa P16.9 ang nalista nga *asset* (kabilugan nga balor sang pagpanag-iya) sini sadtong Disyembre 2003. Halin 1997 tubtub 2001, nag-abot sa P800

bayad ang Maynilad sang P1.2 bilyon para sa mga serbisyo sang mga konsultant kag manedyer nga ginbutang sang Benpres Holdings kag Suez-Ondeo sa Maynilad. Ang mga kompyuter kag iba pa nga kagamitan sang Maynilad ginkontrata man tanan halin sa mga kumpanya nga ginapanag-iyahan sang grupong Suez.

Bisan bilog nga abagahon sang gubyerno ang pagsalbar sa nagakaputo nga kumpanya, pagadumalahan pa gihapon ini sang Benpres Holdings. Padayon man nga kaptan sang Suez-Ondeo ang 19% sang mga sapi sa Maynilad. Pagabululigan nila nga siputon pa ang mga pondo sang Maynilad paagi sang daku nga pagsukot sang Benpres kag Suez-Ondeo para sa serbisyo sang mga konsultant kag manedyer nila nga nabutang sa Maynilad.

Ang utang sang Maynilad nga




milyon ang indi mapathag nga gasto sang Benpres kag Suez-Ondeo. Halin 1997 tubtub 2000, nag-



ginsalo sang gubyerno ipapas-an naman sang gubyerno sa pumuluyo. Agud mabayaran ang mga ini, pasakan sang gubyerno ang sukot sa serbisyo sa tubig tubtub 32%. Dugang ini sa 226% nga ginsaka na sang sukot sa serbisyo umpisa nga kaptan sang Maynilad ang serbisyo sa tubig sadtong 1997. Samtang, nagaabot man sa 350% ang gintaas sang sukot sa pareho nga serbisyo sang Manila Water Company, kumpanya nga ginatag-iyahan sang kumprador nga pamilya Ayala kag sang imperyalista nga grupo Betchel-International Water sang US, United Utilities sang UK, Mitsubishi Corporation sang Japan, nga nagakapot man sang konsesyon sa tubig sa sidlangan nga bahin sang Kamaynilaan. Ang dugang nga pagmahal sa serbisyo sa tubig bunga sang pribatisasyon liw-as sa promisa sang mga imperyalista kag sang papet nga rehimen nga ang pribatisasyon kag deregulasyon ang magapanubo sang sukot sa serbisyo sa tubig.

Sa atubang sang tanan nga ini, wala sang maayo nga igabunga ang pagsapribado sang serbisyo sa tubig. Baliskad sa ginapabugal sang Maynilad, nagaabot gihapon sang 43% sang bilog nga Kamaynilaan ang wala sang tayuyon kag episyente nga serbisyo sa tubig samtang 1.5 milyon ka tawo sa Kamaynilaan ang wala man lang naabutan sang ila serbisyo. Sadtong ginasapribado sang gubyerno ang MWSS sadtong 1997, ginatawag ini nga pinakadaku nga modelo sang pribatisasyon sang pangpubliko nga serbisyo.

Ginabuyag sang mga hitabo umpisa sadto ang kapaslawan sang tanan nga ginapabugal nga mga benepisyo sang polisiyang pribatisasyon, denasyunalisasyon, deregulasyon kag liberalisasyon. Ginapakita sini kon paano sa aktwal ang nagaantos nga ekonomya kag pumuluyong Pilipino ginapuga sang mga dumuluyong nga kapitalista kag lokal nga kahimbon nila kag sa reaksyunaryo. 

## BALITA

### Meralco, nagahirit

ISA pa sa nakakaputo nga kumpanya sang pamilya Lopez ang nagapakitabang liwat sa rehimeng Arroyo. Sining karon lang, namahog ang pamilya Lopez nga nagahana ang malaparan nga kakulangan sa suplay sang kuryente kon indi tugutan ang MERALCO nga magpasaka sang sukot sa serbisyo sa kuryente. Ang MERALCO amo ang pangunahon nga kumpanya sa serbisyo sa kuryente nga kontrolado sang pamilya Lopez.

Gusto sang mga Lopez nga kuhaon na sang gubyerno ang 40-sentimo kada kilowatt-hour nga limite sa ginasukot nga po-

wer purchased adjustment ukon PPA. Ini ang mayor nga ginakuhaan sang ganansya sang MERALCO.

Gusto man sang mga Lopez nga hatagan na sang lubos nga kahilwayan ang tanan nga kumpanya sang kuryente nga kumontra sang suplay sang enerhiya sa mga independent power producers (IPP) ukon pribado nga kumpanya nga nagaprodusar sang kuryente. Ini ang ila sabat sa mabaskog nga pagkamalaut sa subong nga areglo kon sa diin nagakuha sang enerhiya ang MERALCO sa mga kumpanya nga ginapanagiyahan man sang mga Lopez.




### 75 sentimos dugang pasahe, mapaniplang, mapangtungang


GINBALIBARAN sang mga drayber kag opereytor ang mapaniplang kag mapangtungang nga tikang sa gintanyag sang gubernong Arroyo nga 75 sentimos dugang sa pamasahang isa ka adlaw bag-o ang nakatalana nga aksyong protesta sadtong Marso 30 kag 31. Bangud sini, paralisdang ang pangpubliko nga transportasyon sa untat-byahe nga ginlunsar sa madamu nga syudad kag banwa sa bilog nga pungsod sadtong mga araw nga ina.

Ginpakamalaut sang Pinagisang Samahan ng mga Tsuper at Operator Nationwide (PISTON) ang nasambit nga dugang pamasahang bangud kulang ini sa ginademandang P1.50 nga dugang pamasahang kag aplikablang ini sa mga nagapasadang sa mga ruta

halin lima kilometros pataas. Sa sini, madamu nga drayber nga nagapasadang sa malipot nga ruta ang wala nabeneplisyuhan sang anuman nga dugang sa pasahe. Suno sa mga welgista, tuyo lang sini tungang ang kubay sang mga drayber kag opereytor.

Nag-abot sa 80-95% ang paralisasyon sa transportasyon sa Baguio City, Angeles City, bilog nga Bulacan, Calabarzon (Cavite, Laguna, Batangas, Rizal, Quezon), pila ka pangunahon nga banwa kag syudad sa Bicol kag Western Visayas kag sa mga syudad sang Cebu, Mandaue kag Talisay. Sa Mindanao, nag-abot sa duha ka adlaw ang welga nga naglupok sa tanan nga syudad maluwas sa Zamboanga City.



**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXV No. 7  
Abril 7, 2003  
[www.philippinerevolution.org](http://www.philippinerevolution.org)

## Editoryal

# Pamatukan ang nagabaskog nga pagpamigos sa pumuluyong Moro

**D**ugang nga ginapabaskog sang rehimeng Arroyo ang pagpamigos sa pumuluyong Moro. Mabaskog nga kahadlok ang nagaputos subong sa pumuluyong Moro bunga sang mga pagpangsona sa ila mga komunidad, pagreyd sa ila mga balay, arbitraryo nga pagpang-aresto kag pagpangtor-tyur sa kuno mga terorista sa kubay nila. Ang plano sang Philippine National Police nga ipatuman ang sistema sang "Muslim ID" nagalapak lamang sa ila mga kinamatarung sibil.

Lubos nga ginakundenar sang Partido Komunista sang Pilipinas kag bilog nga rebolusyonaryong hublag ang wala untat nga mga atake sang rehimeng Arroyo batuk sa mga tawhanon nga kinamatarung sang pumuluyong Moro. Ang mga tikang sang reaksyunaryong rehi-men nagapalubha sa pungsodnon nga pagpamigos kag prehudisyal nga pagtrato sa mga Moro kag nagalaragway sa ila bilang mga kriminal, tulisan kag elemento nga anti-sosyal. Dala sang mga tikang sang rehimeng Arroyo, gilayon subong nga ginamarkahan man sila nga mga "terorista." Ginahingalitan



kag labing ginapalain sang rehi-meng Arroyo ang mga nagaluntad nga sala nga anti-Moro nga pamen-saron kag kultura sa tuyo nga ipatu-man ang mga polisiyang anti-Moro.

Ginasakpripisyo sang rehimeng Arroyo ang interes sang pumulu-yong Moro sa ngalan sang anti-te-rorismo. Paliwat-liwat nga ginara-son sang rehimeng Arroyo nga may ara kuno mga "intelligence report" nga plano sang Abu Sayyaf nga

sundan ang terorista nga pagpang-bomba sa Madrid, Spain sadtong Marso 11 sang pareho man nga pagpangbomba sa Kamaynilaan.

Tuso nga katuyuan sang rehi-meng Arroyo nga paluntaron ang kahadlok kag isterya sa pumulu-yong Pilipino, maghatag-rason kag magkuha sang simpatiya sa paga-himuon sini nga mga pasistang tikang batuk sa mga Moro. Paagi sa mga ini, nagalaum ang guban

***Mga tampok  
sa isyu nga ini...***

**Mga tampok nga pag-lapas sa tawhanong kinamatarung**

PAHINA 3

**Ambus  
sa Camarines Sur**

PAHINA 6

**Pagbato sa RSOT  
sa Eastern Visayas**

PAHINA 9